

Pro Famia Feliz:

Famia, e fundeshi pa un sociedad sano y feliz

ORANJESTAD - Fundacion Pro Famia Feliz ta cuminsa pa desea tur Famia aki na Aruba un feliz y bendiciona Dia Internacional di Famia. Cu nos Bon Dios Tata Todopoderoso manda un yobida di bendicion riba nos dushi pais Aruba y cu E basha den nos hogarnan na Aruba Su Gracianan, specialmente esun di Amor, na abundancia den cada hogar aki na Aruba!

Fundacion Pro Famia Feliz (F.P.F.F.) ya desde 2004 ta celebrando Dia Internacional di Famia cu un Santo Sacrificio di Misa. E lo tuma luga e aña aki na Capi Santa Famia na Pos Chikito pa 7or di anochi. Fundacion Pro Famia Feliz tin 32 aña ta traha pa bienestar di Famia aki na Aruba (18987) y tin su origen di Iglesia Catolico Romano.

Pader Wijbe Fransen, permaneciendo na Centro Pastoral Aruba, e tempo aya tabata sinti e necesidad pa haci mas pa bida di Famia aki na Aruba. Pd Wijbe tabata ya hopi consciente cu e parti mas fundamental di sociedad ta Famia, y cu e curason di Famia ta e pareha. For di cuminsamento, e plan di Dios tabata cu un homber y un muhe, uni door di Dios den Matrimonio, den un union permanente, lo ta e base di un Famia. E pareha hunto lo mester forma nan famia hunto cu nan yiunan.

Ta e pareha mester percura pa tin felicidad, union, comprension y amor den nan Famia. Cu tempo (siglonan) esaki lastimamente a bai hopi atras, pero Cristo Hesus nunca a bandona nos y semper lo E tey pa yuda nos. Manera mundo ta bai, asina e famia tambe ta bay. Y nos por bisa sin exageracion cu cualkier problema cu ta prevalece den

cualkier sociedad, tin su origen den un famia. Mescos asina, precisamente pa medio di e famia, e mesun problemanan ey, efectivamente por ser evita of supera. Famia awendia ta ser menasa formalmente door di e presion di e sociedad materialistico pafo di cas. Pero famia ta sufri ainda mas tanto di problemanan paden di cas, specialmente e falta di comunicacion, di comprension y di aceptacion entre tur miembro di famia ta crea hopi desunion.

Ora tata y mama, a pesar di nan problemanan y a pesar di nan imperfeccion y flakesa, dicidi pa cariño riba agresion, amor riba violencia, pordon riba rabia, e famia ey ta proclama e victoria di amor, e victoria riba e cruz di Cristo. Asina e misterio di bida Familiar ta tambe: sernan humano cu ta transforma mundo bibando e bida di Hesus, un bida completo cu ta yena e buraconan di mas profundo. Esaki no ta solamente un reto y un bunita aventura, pero e ta e bon noticia. Ora nos bira consciente cu matrimonio y famia tambe ta 'e Bon Noticia', nos ta realiza cu nan ta e manifestacion di Amor Incondicional di Dios, un amor cu nos lo weita den e amor cu esposonan tin pa otro y tambe den e alegria di regalonan precioso di por tin yiu.

Pa medio di esaki e matrimonionan cu tin Hesus bisto den nan matrimonio (luz di mundo-Mt.5:13) y den nan famia, ta bira asina un fuente di noticia alegre pa otro, pa comunidad y sociedad. Nos sociedad aworaki mas cu nunca mester di mayornan cu ta ehempel positivo pa cada fruta di Dios, cu nan trece na mundo. Ta un lastima cu tin hopi mayor cu ta pensa cu nan ta duna nan yiu tur cos, pero esun di mas

importante cu ta amor, no ta presente den e hogar, den e famia. Ta hopi Tata ta duna nan yiu hopi amor, hopi atencion, pero ta faya den e cos di mas importante cu un Tata por duna nan: Esey ta di laga nan weita y sinti cu e ta stima y respeta nan Mama. Esaki ta conta pa e Mama tambe. Ta nos como mayor mester duna nos yiunan e norma y balornan di bida. Principionan manera: fieldad, honestidad, integridad, husticia, confiansa, honor, humildad, compasion, generosidad, piedad y mas cu tur cos, amor pa bo prohimo.

Tur e principionan ey a bin di e Plan di Dios pa humanidad, e matrimonio.

Nos sociedad awendia mester di famianan stabiel, cu por ta e luz pa otro famia, pa por yuda drecha e fundeshi di sociedad, cual Fundeshi semper lo keda: e Famia cu Cristo Hesus presente den e hogar ey. Famia ta keda e luga preferi unda sernan humano ta descubri e mision cu Dios ta duna nan den e mundo aki

y den nos Iglesia pa "medio di nan mayornan".

E Famia ta e estructura social di mas antiguo di henter humanidad. Ta existi un energia enorme denter di tur famia. E energia aki por los specialmente pa mayornan na momento cu nan tuma parti den un fin di siman di un Encuentro Conyugal, unda nan lo haya e oportunidad unico pa encontra cu 'nan mes' y 'nan pareha'. Den tur persona, tur pareha, of famia, tin un energia interno di amor, cu lo ser libera, na momento cu nan cuminsa comunica profundamente, honestamente, cu otro. E comunicacion aki ta habri caminda pa reconciliacion cu nos mes, nos pareha, nos yiunan, comunidad y finalmente cu nos Creador Dios Tata Todopoderoso. Pues kico cu ta, cu ta inspira, fortifica, engrandece of ta duna bida na matrimonio of famia, sigur lo sirbi e bienestar di sociedad completo.

Ta cu esaki den mente, pa fortifica Matrimonio y Famia, Encuentro Conyugal a nace den añanan 60 Siglo pasa.

Durante e siguiente decadanan Pader Gabriel Calvo a traha riba mas cu 15 manual di diferente otro programa di encuentronan pa Famia (mas cu 15). Tur e diferente programanan aki a cambia bida di miyones di pareha casa, yiunan, henter e famia y tambe na un cierto forma, e comunidad, durante e ultimo decadanan!! F.P.F.F ta invita tur pareha sin excepcion pa participa na un Encuentro Conyugal, unda e pareha lo haya e oportunidad pa bira hopi mas consiente cu e "Plan di Dios" pa matrimonio ta unidad y frankesa pa otro. Cu e ta "amor incondicional" pa otro, cu tur e faltanan menos positivo cu nos cada uno ta posee. Cu nos mester sa pordona (y lubida). Cristo Hesus a muri na cruz pa pordon di picanan cu nos tur ta comete. Nos tambe mester "immita Cristo den esaki"!!

Pa mas informacion tocante e programanan di Fundacion Pro Famia Feliz, por tuma contacto cu nos na fpffaruba@yahoo.com.